

NEWSLETTER

2018.

oktobar



”...predavati među stipendistima Fondacije Hastor, u odnosu na sve ostale studente, osjećaj je kao obraćati se Sereni Vilijams, Ronaldu, Mesiju u svijetu sporta...” ili „Uspjet ćeš jer to mnogo želiš, sve ostalo su samo zablude”

Uobičajeno, druga sedmica u mjesecu rezervisana je za mjesečni sastanak stipendista Fondacije Hastor. Tako se ustaljena praksa nastavila u subotu, 13. oktobra 2018. godine. U Velikoj sali ASA Prevent grupacije u Sarajevu okupilo se više od dvije stotine studenata, koji su imali priliku da usvoje određene vještine i znanja od istaknutog poduzetnika, stručnjaka za marketing i motivacijskog trenera – gospodina Kemala H. Balihodžića. Također, on je direktor i vlasnik marketing kompanije Up Trend Marketing Solutions sa globalnim sjedištem u Londonu i Sarajevu. Autor je knjige „Rođeni za uspjeh – od aplaudera do aplauza“, koja je doživjela nekoliko uzastopnih izdanja.

Gospodin Balihodžić predavanje je započeo motivirajućim i inspirirajućim govorom u kojemu su i prisutni studenti interaktivno učestvovali. Stipendisti su imali priliku slušati o tome koliko je, zapravo, važna motivacija zarad postizanja određenog cilja, koliko je važno postaviti prioritete na koje se, kao pojedinci, trebamo fokusirati i koliko je važno ulagati napore pri realizaciji ciljeva koje sami sebi postavimo. Radom i trudom se može postići sve, naravno, uz svijest da ne postoji uspjeh preko noći. Uspjeh je odraz permanentnog učenja, truda i rada.

Kroz zanimljive osvrtne iz vlastitog života, Balihodžić je studentima predstavio vlastiti put, koji je, kako i sam kaže, bio trnovit. Kao dijete koje je rano ostalo bez jednog roditelja, morao se dodatno truditi, učiti i boriti, kako bi ostvario ciljeve koje je postavio. Također, oženio se mlad, sa dvadeset godina, i radio dodatne poslove kako bi izdržavao vlastitu porodicu. Uloženo vrijeme i napor u rad na sebi dodatno ga je poučio disciplini i istrajnosti. Kako i sam kaže, obrazovni sistem često pogrešno percipira sintagmu

„nadareni učenici“. Prema njegovom mišljenju, ne postoje pojedinci koji su nadareniji u odnosu na druge. Svaki čovjek u sebi nosi kapacitet i potencijal koji je potrebno usavršavati. Svaki čovjek je svojom energijom i svojim tijelom splet samo jedne konstante – a to je rad.

Danas smo često svjedoci lošeg školskog sistema koji „ubija“ i ograničava perspektivne i mlade umove. Protiv toga se, kao mlade generacije, trebamo boriti na različite načine. Znanje je jedna od najboljih investicija u koju čovjek može ulagati. Upravo to je glavni pokretač i moto Fondacije Hastor, koja je danas najveća organizacija svoje vrste, ukoliko sveukupno sagledamo svjetske okvire. Uz premanentno učenje, rad i zalaganje za vlastite ideale, svaki pojedinac može prekoračiti granicu uobičajenog i postići ogromnu progresiju.

Ovaj sastanak stipendista odisao je posebnom emotivnom obojenošću, jer smo se na istom opraštali od stipendista/ica koji/e su završili/e svoje



školovanje. Također, poseban je i po tome što su ovom sastanku prvi put prisustvovali bruceši, koji su iz Sarajeva ponijeli znanje, ali i tople trenutke i lijepe uspomene.

Stipendisti kojima je ovo bio posljednji formalni sastanak podijelili su svoje utiske o godinama provedenim u zajednici Fondacije Hastor. Svi su se složili da je Fondacija od početka njihovog stipendiranja bila podrška u njihovom obrazovanju, kako u finansijskom tako i u moralnom smislu. Sretni su jer su imali priliku biti dijelom ove velike priče i svjesni su da ta lijepa priča ovdje ne prestaje. A kako i ne bi, jer svaki mladi čovjek, koji jednom postane dijelom ove velike porodice – tu porodicu (za)uvijek nosi u srcu.

Predavanje gospodina Balihodžića obilježilo je ogroman entuzijazam i želja da sve svoje najiskrenije savjete i upute prenese na studente, stipendiste Fondacije Hastor.

Svi stipendisti, kao zajednica, pokrivaju više od 150 općina u cijeloj BiH, s više od dvije hiljade srca što kucaju u istoj harmoniji, ponosni jer su svjesni da su tu, jedni za druge, svi različiti, a, opet, svi isti i svi zajedno – Fondacija Hastor. Činjenica je da je Fondacija Hastor, nakon dvanaest godina kontinuiranoga djelovanja, postala mjestom izgradnje neraskidivih identitarnih veza, čemu svjedoče i sami stipendisti, mladi ljudi koji ističu da je Fondacija dio njih, onaj dio identiteta koji čuvaju i na koji su ponosni.

Razim Medinić



OKONČANA REALIZACIJA PROJEKTA „JAČANJE PRAKSE OBRAZOVANJA U BIH – UVOĐENJE DUALNOG SISTEMA“

U periodu od 15. septembra 2017. do 30. septembra tekuće godine, Fondacija Hastor je u saradnji s Programom PrilikaPlus, koji podržava Ambasada Švicarske, uspješno finalizirala projekat „Jačanje prakse obrazovanja u BiH – uvođenje dualnog sistema“. Pomenuti projekat inkorporirao je dvije primarne komponente od kojih se jedna referirala na formalno, a druga na neformalno obrazovanje. Djelovanje u pravcu formalnog obrazovanja odnosilo se, prvenstveno, na unapređenje praktične nastave u srednjim školama, dok se segment vezan za neformalno obrazovanje odnosio na osposobljavanje odraslih za izvjesna zanimanja.

Budući da je Program PrilikaPlus prvenstveno orijentiran ka sektoru ekonomije i povećanju stope zaposlenosti, jedan od ciljeva bio je i obuka za odrasle na određenim lokacijama gdje Prevent grupacija raspolaže svojim pogonima. Neki od elementarnih fokusa ovog projekta bili su i na poboljšanju kvaliteta TAKT akademije, kao i njenom pozicioniranju na tržištu i osiguravanju najbolje obuke za njene polaznike, te na izgradnji snažnih relacija između lokalnih zajednica, škola i kompanija. Program PrilikaPlus svojim djelovanjem obuhvata pet oblasti u RS-u i 5 kantona u Federaciji BiH, a dao je i značajan doprinos otvaranju centara za edukaciju u više od pet industrijskih sektora. Jedan od takvih centara je i TAKT akademija koju je pokrenula Fondacija Hastor u saradnji s PrilikomPlus i uz podršku Ambasade Švicarske, kao i vodećih kompanija automobilske, tekstilne, modne i drvne industrije.

Generalno promatrajući, esencijalni cilj ovog projekta je bio obezbijediti adekvatnu obuku kako za mlade, tako i za odrasle, a sve u cilju nadogradnje vještina i kompetencija, te prilagodbe ljudskih resursa najnovijim tehnologijama rada u vodećim kompanijama u BiH i regionu. Zajedničkim djelovanjem omogućena je kvalitetnija podloga za poslovanje ASA Preventa, ali i drugih kompanija, a mladim ljudima je istodobno pružena prilika za stručno osposobljavanje, napredovanje, pa samim tim i za veću mogućnost zaposlenja.

Najrelevantniji indikator uspješnosti realiziranog projekta predstavlja činjenica da je u periodu njegovog trajanja obuku steklo više od 550 osoba, od kojih je većina neposredno nakon iste i zaposlena. Pored navedenog, uspostavljeni su kvalitetni preduvjeti i pokrenuta je registracija TAKT akademije, poboljšana je vještina trenera za obuku odraslih i instruktora u kompanijama prema DACUM metodologiji, uspostavljene su pozitivne prakse dijeljenja iskustva između univerziteta i članica Prevent grupacije, u značajnoj mjeri su osnažena partnerstva između lokalnih zajednica, škola i kompanija koje pružaju stručno osposobljavanje te su učenici srednjih stručnih škola u nekoliko općina svoju praktičnu nastavu počeli izvoditi u kompanijama ASA Prevent grupacije i u partnerskim kompanijama. Također, izrađen je i jedinstveni model finansiranja u saradnji s ASA Bankom koji predstavlja revolucionaran, dugoročan i konkretan vid podrške procesu finansiranja obuke odraslih.

Amina Vatreš

JEZIČKO – PRAVOPISNE NEDOUVICE

U ovomjesečnom izdanju rubrike **FH učionica**, predstavljamo vam nekoliko jezičko-pravopisnih savjeta.

IZVINITI SE ILI IZVINUTI SE

Neko će reći da se izvinio zbog učinjene greške, a neko da se izvinuo. U bosanskom jeziku postoje oba glagola: **izviniti se** i **izvinuti se**. Glagol **izviniti se** znači zamoliti nekoga za oprostaj, pravdati se nekome, a glagol **izvinuti se** znači saviti se, izviti se i sl. Njihova značenja ne treba miješati u govoru, niti u pisanju. Kad se pogriješi, kad se napravi kakva greška, kad se učini nekome nešto nenamjerno, neželjeno, onda se treba **izviniti** ili, ako neko želi, ispričati se.

DEČKO ILI DJEČKO

To je vrlo česta riječ za dječaka, momčića, momka, mladića. Pravopisi su i za ijekavski izgovor preporučivali ekavski oblik **dečko**, iako je ijekavski oblik **dječko** bio vrlo raširen u govoru, ali se mogao pronaći i u štampi. U sarajevskim Večernjim novinama od 4.3.1996. godine na strani 19 piše: Naime, dječko koji se malo „žešće“ veselio muzici koju voli bio je upozoren od šest mladića

da se „malo smiri“. U Pravopisu bosanskoga jezika data je prednost upotrebi oblika **dječko**. Takvo opredjeljenje opravdava ijekavski oblik i njegova učestalost javljanja u bosanskom jeziku.

CRVENITI I CRVENJETI

Ova dva glagola nemaju isto značenje. Glagol **crveniti** znači: činiti nešto crvenim, bojiti nešto crvenom bojom, a glagol **crvenjeti** znači: postajati crven, dobijati crvenu boju, rumen (kao kad se stidite):

Nemoj to crveniti (znači: nemoj to bojiti crvenom);

Nemoj se crvenjeti (znači: ne budi crven, rumen u licu).

Priredio: Razim Medinić



DA VAM ISPRIČAM

Na sastanku studenata stipendista Fondacije Hastor Armina Đugum se zahvaljuje Fondaciji na pruženoj pomoći u vidu stipendije posljednjih 11 godina, a potom se obrati meni riječima: „Učitelju Ramo, sjećam Vas se kad ste prvi put došli u Oplećane i razgovarali s mojim roditeljima o stipendiji. Sjećam se i 30. januara 2015. godine, kada ste mi, također, u prisustvu roditelja uputili opravdanu kritiku, s obzirom na to da nisam izvršila svoju obavezu. Sjećam se i našeg susreta 28. jula 2018. godine, kada ste stigli da mi, po ko zna koji put, prije mojih roditelja date savjet. Kada sam rekla da imam tremu, zahtijevali ste da je pričuvate dok završim s odbranom magistarskog rada. Nasmijala sam se i trema je zaista nestala, a tada su stigli i moji roditelji. Bilo je još mnogo veoma dragih i korisnih susreta. Sad sam diplomirana doktorica i već imam ponudu za posao, što je san većine mladih. Ovo Vam govorim, umjesto zakletve, da ću i dalje ostati uz Vas i Fondaciju Hastor, iako više nisam Vaša stipendistica.“

Prije nekoliko dana pozva me Muharem Karać na odbranu svog magistarskog rada na Fakultetu političkih nauka u Sarajevu. Senada Ćerimić me obavijesti da je osvojila Povelju dekana: „Naime, kao najbolji student u svojoj generaciji na Politehničkom fakultetu u Zenici, dobila sam Povelju dekana za prosjek ocjena 9,2 u protekloj akademskoj godini, te na taj način zaokružila svoje dodiplomsko obrazovanje. Ceremonija dodjele nagrada počinje u 11 sati u Zenici, 27. oktobra 2018. godine.“

Ubrzo dobijam pismo od Josipe Bagarić iz Tomislavgrada, tačnije iz Bukovice 86, koga doslovno prepisujem, jer bilo kako da ga prepričam, nije vjerno originalu:

Dragi učitelju,

Prije nekoliko minuta sam poslala administraciji mail u kojemu se kao stipendista opraštam od Fondacije Hastor. Završila sam svoj diplomski studij i nakon 11 godina više nisam stipendista Fondacije Hastor.

Tamo sam već navela da, iako više neću primati finansijsku potporu, Fondacija će uvijek biti dio mene. Neke od najljepših trenutaka doživjela sam upravo tu, Fondacija je uveliko utjecala na izgradnju moje osobnosti, moje obrazovanje je djelo mojih roditelja i Fondacije. Iz ovoga razloga nije moguće da će se naši putovi razići. Uvijek ću s ogromnim ponosom naglašavati da sam bila dio te velike obitelji.

Posebno se želim zahvaliti Vama. Hvala Vam što ste onu mirnu, neprimjetnu djevojčicu, kakva sam bila, izvukli iz mase. Pružili joj svoju ruku i započeli njenu priču kao stipendistice Fondacije Hastor. Hvala Vam što ste vjerovali da vrijedi ulagati u mene. Kako sam odrastala, sve više sam shvaćala vrijednost te pružene ruke. Također, Vaši savjeti su mi pomogli bezbroj puta. Radovala sam se svakom našem susretu jer sam znala da ću naučiti jednu važnu životnu lekciju. Na svakoj toploj riječi, učitelju Ramo, hvala Vam, na svakoj konstruktivnoj kritici ili savjetu koje sam se trudila usvojiti. Naučila sam mnogo toga razvila radne navike, upoznala divne ljude i stekla prave prijatelje. Na svemu tome veliko HVALA. Bila mi je čast stajati uz bok ljudima poput vas. Kao najvažnije navela bih to da me Fondacija naučila kako nesebično pomagati drugima. Vrijednosti koje ste mi usadili čuvat ću vječno.

Teško mi je pronaći riječi kojima bih iskazala svoju zahvalnost, nadam se da ću Vam biti na ponos jednoga dana. Do tada vrata moga doma i moga srca zauvijek su Vam otvorena.

Hvala Vam, učitelju!

*Srdačan pozdrav,
Josipa Bagarić*

Poslije ovako iskrene zahvale svaka riječ je suvišna.

Ramo Hastor



Naša Fondacija može se pohvaliti velikim brojem stipendista koji, pored što ostvaruju značajne uspjehe u sferi obrazovanja i nauke, veliki doprinos i značaj posvećuju volonterskom radu u okviru Fondacije Hastor te svojim znanjem i vještinama unapređuju njen rad.

Među takvim stipendistima svoje mjesto našla je i Amina Mašić, stipendistica mjeseca oktobra.



Amina
Mašić



Vrijedna Amina Mašić stipendistica je Fondacije Hastor već osam godina. Pohađala je Osnovnu školu „Kladanj“, a potom Mješovitu srednju školu „Musa Ćazim Ćatić“, na smjeru Šumarski tehničar. Trenutno je studentica Šumarskog fakulteta u Sarajevu. Amina je dosad bilježila fantastične rezultate, kako u nastavnim, tako i u vannastavnim aktivnostima. Značajne rezultate ostvarila je na općinskim, kantonalnim, državnim i međunarodnim takmičenjima iz polja književnosti. Svoj talenat pokazala je i u pisanju eseja, koji su objavljeni u brojnim istaknutim književnim časopisima i zbornicima. Aktivna je članica i volonterka u različitim nevladinim organizacijama koje se bave pitanjima mladih, marginaliziranih grupa i sl. Na osnovu dosadašnjeg rada, 2017. godine Mreža vijeća/savjeta učenika Bosne i Hercegovine Aminu je uvrstila u 20 najaktivnijih srednjoškolaca BiH. U protekloj akademskoj godini Amina je bila volonter u Asocijaciji studenata Šumarskog fakulteta, kao

i u radu Studentskog parlamenta Univerziteta u Sarajevu.


Njen trud nije izostajao ni kada je riječ o Fondaciji Hastor. Svoje obaveze uvijek je redovno izvršavala i bila je na raspolaganju kada je god pomoć bila potrebna. Sve navedeno razlog je da Amina nosi titulu stipendistice mjeseca.

Ističe da je ponosna što je dio tima koji mladim ljudima pruža mogućnost za stjecanje novih znanja. „Podrška Fondacije Hastor, kako finansijska tako i moralna, dala mi je snagu da istrajem u svojim ciljevima. Također, kroz volontiranje na terenu sam stekla znanja i vještine koje su mi puno pomogle u formalnom obrazovanju, ali i u životu. Fondacija Hastor je moja zvijezda vodilja.“

Belma Zukić



 : Delila Veispahić



Na osnovu baze podataka utvrđeno je da su stipendisti i volonteri Fondacije Hastor u proteklom mjesecu zabilježili 15239 volonterskih sati. Kao i do sada, najveći broj volonterskih sati ostvaren je na volonterskim sastancima naših stipendista – studenata, srednjoškolaca i osnovaca na 271 volonterskih radionica u 60 općina širom Bosne i Hercegovine. Ovoj velikoj brojci doprinosi i volonterski angažman naših studenata koji volontiraju u administraciji i redakciji Fondacije Hastor, kao i angažman stipendista koji rade na razvoju i održavanju aplikacije Fondacije Hastor i naše web-stranice. Obavezna tema o kojoj su naši stipendisti diskutovali na svojim volonterskim druženjima proteklog mjeseca je „Poštovanje starijih i osnovne norme ponašanja (bonton)“

Pored obavezne teme, stipendisti su obrađivali i druge interesantne teme, a naši studenti su dio volonterskih sati odvojili kako bi pomogli mlađim stipendistima da što bolje savladaju školsko gradivo.



Neke od najzanimljivijih tema:

- “ „Budi promjena koju želiš vidjeti u svijetu“
- Čarobne riječi: izvoli, oprosti, hvala i molim ”
- “ Id, ego i superego Zabavna matematika
- U zdravom tijelu zdrav duh Let's do it!
- Zdravi stilovi života na putu djetinjstva “ Cyber kriminal
- “ TED Talk - „Are you a giver or a taker“
- Budućnost mladih u Bosni i Hercegovini ”
- Različite vještine učenja i savladavanja gradiva
- “ Evolucija čovjeka

Općine u kojima su u proteklom mjesecu održane volonterske radionice:



Poštovani,

ovih dana na Vašu adresu treba stići potvrda da sam završila svoj diplomski studij. Za doktorski studij trenutno nemam mogućnosti, ali se nadam da ću i to uspjeti u skorije vrijeme.

Nakon 11 dugih godina više nisam stipendistica Fondacije Hastor, to me ispunjava tugom, ali i ponosom što sam imala Vaše povjerenje svih ovih godina. Ovim putem želim Vam se zahvaliti na pruženoj potpori, svakoj konstruktivnoj kritici ili savjetu koji sam se trudila usvojiti. Iako više neću primati finansijsku potporu, Fondacija će uvijek biti dio mene. Unutar ove velike obitelji sam provela gotovo polovicu svoga života, naučila mnogo toga, razvila radne navike, upoznala divne ljude i stekla dobre prijatelje. Na svemu tome veliko HVALA!

Kao najvažnije, navela bih to da me Fondacija naučila kako nesebično pomagati drugima. Nadam se da ću jednoga dana biti u mogućnosti činiti to isto.

Zajedno sa mojom obitelji omogućili ste moje obrazovanje. Iz tog razloga stečeno znanje i vještine stavljam Vama na raspolaganje. To je najviše što sada mogu u znak zahvale.

Do tada s ponosom ću isticati da sam bila dio Fondacije Hastor.

Šaljem Vam i moj diplomski rad, imam želju podijeliti ga s Vama jer sam njime zatvorila veliko poglavlje u životu.

Još jednom hvala na svemu!!

Srdačan pozdrav,
Josipa Bagarić